

Inyarubha ye embere ya Yoohana Ubhukangati

Inyarubha yinu ikaandikwa na Yoohana. Muzinyarubha isatu za Yoohana, hanu akubhuga “itwi,” ariigamba umwene hamwimwi na abhatumwa abhakindichazi. Hanu aandikiri zinyarubha zinu, aari akukunguhiri.

Manyarubha yinu araandikira Abhakiriisitu, bhanu aari asiigiri bhukung’u. Akabhabhirikira “abhaana bhaani abhasiigwa.”

Yoohana araandikira Abhakiriisitu korereke abhahi ubhutungiri iguru wu ubhwikari bhwi likiriisitu. Kwiki arahurucha amaangirija iguru wa amiija gu ururimi. Kwari na abhiija obhorebhe bhanu bhaari bhatigiri amasengerero, bhakabha bhariiruguura marubhiri ruyo na kunyaragan’ya amiija gu ururimi.

Yoohana arakandikija kubha Yisu Kiriisitu ni ing’ana rya Mungu wanu aari umuntu. Bhanu bhakubhuga Kiriisitu ataari muntu, ni-bhabhisa bha Kiriisitu, ni-bhabhihi na ni-bhiija bhu ururimi. Mungu, ni-bhasiigi necho abhaatu bhaazi bhareenderwa kusiigana, ku kubha ukusiiga Mungu nu ukusiiga umukindichazu, ne-kegero kimwi. Ubhuhuru bhwa kemerano bharabhoneka ku kwisirirya Yisu Kiriisitu, ukutama kumwisirirya, umuntu atakutara kusung’aana ubhuhuru bhwa kemerano.

Ing'ana yu ubhuhuru

¹ Turabharagan'ya ing'ana iguru wa wanu akubhirikirwa Ing'ana yu ubhuhuru, wanu aareho kurwa ubhutangi.* Itwi tukamwigwa na komorora na amisu giitu, tukamorora na kubhaabhaata na amabhoko giitu.

² Ubhuhuru bhuyo bhukarorekana, na niitwi tukabhorora. Nangu turabhamenyeekeererya na kubharagan'ya ing'ana iguru wa wanu ni-bhuhuru bhwa kemerano. Ewe aari kwa Bhaabha Mungu, akarorekana kwa niitwi.†

³ Tukamorora na kumwigwa, nangu turabharagan'ya ing'ana iguru waazi, korereke mubhi ni ikigwatani na niitwi mubhwisirirya. Ikigwatani kinu tunachu ni-hamwimwi na Bhaabha Mungu, nu Umwana waazi‡ Yisu Kiriisitu.

⁴ Turabhaandikira ganu, korereke obhomerwa bhwitu bhuhiki.

Ukwikara mubhwiru

⁵ Mmbe, amang'ana ganu twigwiri kurwa kwa Yisu Kiriisitu, nego tukubharwazira, Mungu ni-bhwiru, ataana ikiirimya chuchusi musi waazi.

⁶ Ariibhi turabhuga tuni ikigwatani na Mungu, inu tarakaja kwikara mukiirimya, taragamba ururimi, na tutakokora eheene.

⁷ Nawe, ariibhi turiikara mubhwiru, chimbu Mungu ari mubhwiru, tarabha ni ikigwatani itubheene kobheene. Na amasaahi gu Umwana waazi Yisu garabhingukya ubhubhi bhwitu bhwasi.

* **1:1** Rora Ubhutangi 1:1; Yoojana 1:1-3. † **1:2** Rora Yoojana 1:14. ‡ **1:3 Umwana waazi.** Kamaragirira bhukung'u, rora ring'ana *Umwana wa Mungu* muKiniibhasa.

⁸ Ariibhi turabhuga kubha itwi tutaana ubhubhi bhwbhwusi, turiikangirirya itubheene, ne eheene itari kwa niitwi.

⁹ Nawe, ariibhi turaatigi ubhubhi bhwitw, Mungu aratobheerera ubhubhi bhwitw na kutubhingukya ubhubhi bhwusi, ku kubha ewe, ne-moheene na we eheene.

¹⁰ Turiibhugi tukiri kokora ubhubhi, tarakora Mungu mubhihi, na twangiri ring'ana ryazi kimwi.

2

Yisu Kiriisitu newe akutwabhira

¹ Abhaana bhaani abhasigwa, nirabhaandikira amang'ana gayo, korereke mutasarya. Nawe ariibhi umutw wuwusi araasaryi, tunawe wanu akutwibhagira kwa Bhaabha Mungu. Wuyo newe Yisu Kiriisitu we eheene.

² Ewe newe ikimweso* chu ukutugwatan'ya na Mungu ku kuruushaho ubhubhi bhwitw. Na itari ubhubhi bhwitw ubhwene, nawe nu ubhubhi bhwa abhaatu bhusi bha kuusi.

³ Turiigwati imigirw ja Mungu, neho tokomenya tumwizi.

⁴ Wuwusi wanu akubhuga kubha amwizi Mungu inu atakugwata imigirw jazi, ni-mubhihi, atizi amaheene.

⁵ Nawe umutw wanu akugwata ring'ana ryazi, maheene ubhusigi bhwa Mungu bhunagiibhwi heene heene. Kwa rinu tuminyiri kubha tunu ubhumwimwi na Mungu.

* **2:2 Ikimweso.** Kumaragirira bhakung'u, rora ikiniibhasa.

⁶ Umuntu wunu akubhuga anu ubhumwimwi na Mungu, areenderwa iikari chimbu Yisu iikiri.

Amaswaja ga Yisu iguru wu ukusiigana

⁷ Abhasiigwa bhaani, amaswaja ganu nikubhaandikira gatar mahya, nawe ni-maswaja gi ikari garyagarya, ganu mwari mwizi kwima hanu mwatangiri kwisirirya Kiriisitu.† Amaswaja gi ikari gayo, ni-ring'ana rinu mwigwiri iguru wu ukusiigana.

⁸ Naurubhu, amaswaja ganu nikubhaandikira, nego amahya. Amaheene ga riswaja rinu rikarorekana mubhwikari bhwa Yisu Kiriisitu, na mubhwikari bhwanyu, ku kubha ikiirimya kirahita nu ubhwiru bhwe eheene bhumariri kubhanza.

⁹ Umuntu wuwusi wunu akubhuga, ariikara mubhwiru inu arabhihirirwa abhahiiri bhaazi, akiiri ariikara mukiirimya.

¹⁰ Wuwusi wunu asiigiri umuhiiri waazi, ariikara mubhwiru. Kitareeho chuchusi kinu kikirya asaryi.

¹¹ Nawe wunu akubhihirirwa umuhiiri waazi, ari mukiirimya. Na aragenda mukiirimya, inu atiizi hanu akuja, ku kubha ikiirimya kikundikiiryi amisu gaazi.

¹² Nirabhaandikira abhaana bhaani abhasiigwa, ku kubha ubhubhi bhwanyu bhubhiirirwi ku kuhitira Yisu Kiriisitu.

¹³ Nirabhaandikira bhabhaabha, ku kubha mwizi Yisu Kiriisitu, wunu aareho kwima ubhutangi. Nirabhaandikira abhamura,

† 2:7 Rora Yoojana 13:34.

ku kubha muhiziri Shitaani.
Nirabhaandikira abhaana,
ku kubha mwizi Bhaabha Mungu.

¹⁴ Nirabhaandikira bhabhaabha,
ku kubha mwizi Yisu Kiriisitu,
wunu aareho kwima ubhutangi.
Nirabhaandikira abhamura,
ku kubha muna amanaga,
murakaja kugwata ing'ana ya Mungu,
na muhiziri Shitaani.

¹⁵ Mutasiiga kokora ubhubhi bhwi isi, na
amang'ana ganu gari muni. Umuntu wunu asiigiri
isi, ubhisiigi bhwa Bhaabha ataanabhi.

¹⁶ Ubhubhi bhwa kuni nebhwe bhunu, umwuyu
umubhi gwu umubhiri, rihari ryu ukubha nachu
chuchusi kinu umuntu akiruzi, nu ubhwiungu ku
kubha yu ubhuniibhi. Bhyu bhiyo bhitakurwa
kwa Bhaabha Mungu nawe bhirarwa muni muni.

¹⁷ Isi hamwimwi ni inamba yaku imbi,
bhirahita. Nawe wuwuni wunu akokora chimbu
Mungu akwenda, arabha nu ubhuhuru bhwa
kemerano.

Abhabhisa bha Kiriisitu

¹⁸ Abhaana bhaani abhasigwa, zisiku zi itiniru
zihikiri! Mwigwiri umubhisa wa Kiriisitu[‡]
araaza, na nangu abhabhisa bhaaru bha Kiriisitu
bhamariri kuuza. Ihu nimbu taminyiri turi
muzisiku zi itiniru.

[‡] **2:18 Umubhisa wa Kiriisitu**, enzobhooro yaku ni-wunu ak-
wanga Kiriisitu.

19 Abhaatu bhayo bharuuri mamasengerero giitu, nawe bhataari nu ubhumwimwi na ni-itwi. Bhangabhiri bhakindichitu bhaari bharasaaga hamwimwi na niitwi. Nawe bhakarweho korereke emenyekani kubha itari bhushi ni-bhakindichitu.

20 Nawe imwi, Umurindu Yisu abhahiri Egoro yaazi,§ nangu imwusi mwizi amaheene.

21 Nitabhaandikiiri inyarubha yinu, ku kubha mutizi amaheene, nawe ku kubha mwizi, rutareeho ururimi rwurwusi runu rukurwa kumaheene.

22 Umuntu umubhihi ni-wiwi? Umuntu umubhihi ni-wuwusi wunu akwanga Yisu ni-Kiriisitu.* Wuwusi wunu akwanga Bhaabha Mungu na Yisu Umwana waazi, newe umubhisa wa Kiriisitu.

23 Umuntu wunu akwanga Umwana, ataana bhumi na Bhaabha Mungu. Nawe, wunu akwisirirya Umwana mbhutangi bhwa abhaatu, anu ubhumwimwi na Bhaabha Mungu.

24 Nangu, makaji kugagwata mumyuyu janyu amang'ana ganu mwijibhwi kwima ubhutangi.

§ 2:20 **Abhahiri Egoro yaazi** kuKigiriki ni-muhakirwi amaguta. Ribhaga ryu Ubharagi bhwi ikari, Abhiizirairi bhaari bharatwara abhaatu momeremo ji ikikuhaani na ju ubhutimi. Bhakabhahaka amaguta kumitwi kwerecha kubha Mungu abhahiri emeremo obhorebhe hamwimwi na ubhanaja bhwe Egoro Indindu. Kamaragirira bhukang'u, rora ring'ana *Egoro Indindu* muKiniibhasa. Rora 1 Samwiri 16:13; Isaaya 61:1. * 2:22 **Kiriisitu**, enzobhooro yaku ni-wanu arabhwirwi na Mungu kubhasabwara abhaatu na kubhakangata mbhutimi bhwazi. Kamaragirira bhukang'u, rora Ikiniibhasa.

Ariibhi murakaja kugwata amiija gayo, murabha nu ubhumwi nu Umwana na Bhaabha Mungu.

²⁵ Na bhuyo, nebhwe ubhuragi bhwa ubhuhuru bhwa kemerano bhun ataragiin'yi.

²⁶ Nibhaandikiiri amang'ana gayo, kubharecha iguru wa abhaatu bhanu bhakwenda kubharimirya.

²⁷ Nawe imwi, Kiriisitu abhahiri Egoro Indindu, yinu ikwikara kwa niimwi. Wuyo newe akubhija guusi, na amiija gaazi ni-ga amaheene, gataru guririmi. Kwibhu, mutakwenderwa kwijibhwa na wundi.† Chimbu Egoro ibhijiryi, mukaji kubha nu ubhumwimwi na Kiriisitu.

²⁸ Nangu abhaana bhaani abhasigwa, mukaji kubha nu ubhumwimwi na Kiriisitu, korereke ribhaga rinu arigaruki, tubhi nu ubhukararu, tutasuka embere waazi.

²⁹ Ariibhi mwizi Kiriisitu, ne-moheene, momenye wuwusi wanu akokora ge eheene, ni-mwana wa Mungu.

3

Ukwikara ncha abhaana bha Mungu

¹ Morore chimbu Bhaabha Mungu atusigiri bhukung'u, kubha itwi tubhirikirwi abhaana bhaazi! Maheene nimbu turi. Nawe abhaatu bhanu bhatakwigwa Mungu, bhatakwobhoora kubha itwi, ni-bhaana bha Mungu, ku kubha bhatamwizi ewe.

² Abhasigwa bhaani, tuminyiri kubha nangu itwi ni-bhaana bha Mungu, nawe ikiiri komenyekana bhwaheene chimbu turibhi hanu

† 2:27 Rora Yooohana 14:26.

Kiriisitu arigarakiki naatu. Nawe tuminyiri, turatuubhana neewe, ku kubha taramorora chimbu ari.

³ Umuntu wuwusi wunu akwisega kubha aratuubhana na Kiriisitu ahiibhinkukya, korereke abhi murindu ncha Kiriisitu.

⁴ Wuwusi wunu akokora ubhubhi, arasarya imigira ja Mungu, ku kubha okokora ubhubhi, nekwe akusarya imigira.

⁵ Mwizi kubha Kiriisitu akaaza kuusi, korereke aruushi ubhubhi bhwi. Naatu ewe ataana ubhubhi bhwabhwusi.

⁶ Nangu iri habhwira, wuwusi wunu akong'eha kubha nu ubhumwimwi neewe, atakong'eha kokora ubhubhi. Nawe wuwusi wunu akong'eha kokora ubhubhi, atizi Kiriisitu ni-wiwi, na ataminyiri.

⁷ Nangu, abhaana bhaani abhasigwa, mutisirirya umuntu wuwusi abharimiri. Wuwusi wunu akokora amang'ana ge eheene, ane eheene chimbu ewe, ne-we eheene.

⁸ Nawe wuwusi wunu akong'eha kokora ubhubhi, ni-muntu wa Shitaani.* Tuminyiri, ku kubha Shitaani ang'ihiri kokora ubhubhi kwima ubhutangi. Nawe Umwana wa Mungu akaaza kuusi, korereke asaryi emeremo ja Shitaani.

⁹ Wuwusi wunu abhiri umwana wa Mungu, atakong'eha kokora ubhubhi, ku kubha anu ubhuhuru bhwa Mungu. Atakutara kong'eha kokora ubhubhi, ku kubha ni-mwana wa Mungu.

¹⁰ Nawe umuntu wunu atakokora amang'ana ge eheene, hamwi wunu atasigiri umuhiiri waazi,

* **3:8 Shitaani.** Kamaragirira bhukung'u, rora ikiniibhasa.

wuyo atari umwana wa Mungu. Ibhu nimbu tukwahukan'ya abhaana bha Mungu na abhaana bha Shitaani.

Musiigani

¹¹ Kwima hanu mwatangiri kwisirirya, mwigwiri amang'ana kubha toreenderwa kusiigana itubheene kobheene.

¹² Tutabha ncha Kaini, chimbu aakangatirwi na Shitaani, akiita umunyi waazi.† Ni-kwaki akamwita? Akamwita ku kubha amahocha gaazi gaari mabhi, nawe gu umunyi waazi gaari ge eheene.

¹³ Nangu abhahiiri bhaani, mutarugura ariibhi abhaatu bhanu bhatakwigwa Mungu bharaabhabhihirirwi.

¹⁴ Itwi tuminyiri turuuri muzinguru zu uruku, na nangu tunu ubhuhuru bhwa kemerano. Tuminyiribhu, ku kubha tusigiri abhahiiri bhitu. Nawe umuutu wawusi wanu ataana ubhusigi, akiiri muzinguru zu uruku.‡

¹⁵ Wawusi wanu akubhihirirwa umuhiiri waazi, ni-mwiti. Mwizi kubha atareeho mwiti wanu anu ubhuhuru bhwa kemerano mamubhiri gwazi.

¹⁶ Hanu Kiriisitu aaruushiryi ubhwikari bhwazi iguru wiitu, akatwereken'ya ubhusigi bhwa amaheene. Naatu na niitwi, toreenderwa kuruusha ubhwikari bhwitu iguru wa abhahiiri bhitu.

¹⁷ Umuutu wawusi we ebhegero bhyu ukwisa, areemorore umuhiiri waazi anu ubhwindi, nawe ataana umwya gwi ibhigangi gwa ukumusakirya, nangu arabha nu ubhusigi bhwa Mungu?

† 3:12 Rora Ubhutangi 4:1-8. ‡ 3:14 Rora Yoojana 5:24.

18 Abhaana bhaani abhasiigwa, tutasiigana kwa amang'anabhu, nawe tasiigani heene ku kwikorera amazumu.

19 Turisiiganibhu, neho turaamenye kubha itwi, ni-bhaatu bhe eheene, naatu imyuyu jitu girahoreera mubhutangi bhwa Mungu.

20 Nuru ariibhi turiitinirwi mozekoro zitu kubha tukuriri ubhubhi, tuminyiri Mungu newe amakuru kukira zekoro zitu, ne ewe aminyiri guusi.

21 Abhasiigwa bhaani, ariibhi tutatiniirwi mozekoro zitu, turatira kubha na ubhakararu bhu ukwisuka mubhutangi bhwa Mungu.

22 Naatu turasung'aana kurwa kwawe ryaryasi rinu tukusabha, ku kubha turiigwa amaswaja gaazi na kokora ganu gakomozomera.

23 Amaswaja gaazi nego ganu, kubha turyisiriryi iriina ryu Umwana waazi, Yisu Kiriisitu, na kusiigana chimbu ataragiin'yi.

24 Umuntu wawusi wanu akugwata amaswaja ga Mungu, anu ubhumwimwi neewe. Mungu wusi anu ubhumwimwi neewe. Tuminyiri kubha Mungu ariikara mubhumwimwi na niitwi ku kubha tone Ekoru Indindu yinu atuhiri.

4

Okomenya ekoro ya amaheene na ya ururimi

1 Abhasiigwa bhaani, mutiisirirya umuntu wawusi wanu akubhuga ane Ekoru ya Mungu. Nawe morore bhwaheene ariibhi umuntu arakangatwa ne Ekoru ya Mungu hamwi ziyi. Mokorebhu ku kubha abharutiriri bhaaru bhu ururimi bhabhunikiri kuusi.

² Inzira yo okomenya kubha umuntu arangan-gatwa ne Egoro ya Mungu neyo yinu. Wawuwusi wanu akwisirirya Yisu Kiriisitu akaaza nchu umuntu, wuyo newe akukangatwa ne Egoro ya Mungu.

³ Nawe wawuwusi wanu atakwisirirya Yisu aari nu umubhiri gwumuntu, atakukangatwa ne Egoro ya Mungu. Umuntu wuyo arangatwa ne egoro yu umubhisa wa Kiriisitu. Na niimwi, mwigwiri kubha umubhisa wuyo araaza, na nangu ari kuusi.

⁴ Nawe abhaana bhaani abhasigwa, imwi ni-bhaana bha Mungu, na niimwi muhiziri abharutiriri bhu ururimi bhayo. Mukatura kubhahiza ku kubha mone Egoro ya Mungu. Eyo inu ubhunaja kukira egoro ya Shitaani wanu ari kuusi.

⁵ Abharutiriri bhu ururimi bhayo, ni-bha kuusi, necho bharagamba amang'ana gi isi. Na abhaatu bha kuusi bhanu bhatakwisirirya Mungu, bharab-hiitegeerera.

⁶ Itwi ni-bhaana bha Mungu. Wawuwusi wanu yiizi Mungu, aratwitegeerera. Nawe wanu atari umwana wa Mungu, atakutwitegeerera. Ibhunimbu tukwahukan'ya gati wa abhaatu bhanu bhakukangatwa ne Egoro ya amaheene, na bhanu bhakukangatwa ne egoro yu ururimi.

Mungu ni-bhasigi

⁷ Abhasigwa bhaani, tusigani, ku kubha ubhasigi bhurarwa kwa Mungu. Umuntu wawuwusi wanu asigiri abhakindichazi, ni-mwana wa Mungu, na newe yiizi Mungu.

⁸ Nawe wawwusi wanu atasiigiri abhakindichazi, atizi Mungu, ku kubha Mungu, ni-bhasiigi.

⁹ Mungu akeerecha ubhasiigi bhwazi kwa niitwi kunzira ya ukutuma Umwana waazi umumwimwi kuusi, korereke tobhone ubhuhuru bhwa kemerano kuhitira kwawe.

¹⁰ Bhanu nebhwe ubhasiigi, itari itwi tukasiiga Mungu, nawe ewe newe aatasiigiri. Neyo enzobhooro akatuma Umwana waazi, korereke abhi ikimweso chu ukutugwatan'ya na Mungu ku kuruushaho ubhuhuri bhwiu.

¹¹ Abhasiigwa bhaani, ku kubha Mungu aatasiigiri itwi, itwasi toreenderwa tasiigani.

¹² Atareeho umutu wawwusi wanu amaruuzi Mungu ibhaga ryaryasi. Nawe tasisigani, Mungu ariikara mubhumwimwi na niitwi, nu ubhasiigi bhwazi bhunagiri kwa niitwi.

¹³ Itwi tunu ubhumwimwi na Mungu, na Mungu anu ubhumwimwi na niitwi. Taminyiri, ku kubha atuhiri Egoro yaazi.

¹⁴ Itwi taruuzi na komenyeekererya abhandi kubha Bhaabha Mungu akatuma Umwana waazi kuusi, korereke abhi Umusabhuri wa abhaatu bhuusi.

¹⁵ Umutu wawwusi wanu akwisirirya Yisu ni-Mwana wa Mungu, Mungu anu ubhumwimwi nawe, wusi anu ubhumwimwi na Mungu.

¹⁶ Nangu, itwi taminyiri na kwisirirya kubha Mungu atasiigiri. Mungu, ni-bhasiigi. Wawwusi wanu akwikara kubhasiigi, newe anu ubhumwimwi na Mungu, Mungu wusi anu ubhumwimwi neewe.

¹⁷ Kunzira yiyo, ubhasiigi bhunagiri kwa niitwi, korereke ubhi nu ubhukararu kurusika rwu uku-

tinirwa, ku kubha ubhwikari bhwitw mwasu manu
bhwangi bhwa Yisu Kiriisitu.

18 Hanu hanu ubhwasigi hataana bhwabha,
nawe ubhwasigi bhwa amaheene bhahaaruusha
ubhwabha, ku kubha ukutindirwa nekwe
kukugirya abhaatu bhubhahi. Umuntu wawusi
wanu anu ubhwabha, ubhwasigi bhwa Mungu
bhukiri kanaga kwawe.

19 Itwi tunu ubhwasigi, ku kubha Mungu newe
aakangatiri kutusiiga.

20 Ariibhi umuntu arabhuga asigiri Mungu,
inu arabhihirirwa umuhiiri waazi, ni-mubhihi.
Tuminyiri ni-mubhihi, ku kubha ariibhi atasigiri
umuhiiri waazi wanu akomorora, atakutara
kumusiiga Mungu wanu akiri komorora.

21 Mmbe, Mungu atuhiri riswaja rinu, wawusi
wanu amusiigiri Mungu, areenderwa asigi nu
umuhiiri waazi.*

5

Ubhwisirirya bharahiza ubhushi

1 Umuntu wawusi wanu akwisirirya Yisu
ni-Kiriisitu, wuyo newe umwana wa Mungu.
Wawusi wanu asigiri bhaabha, asigiri na
abhaana bha bhaabha wuyo.

2 Ihu nimbu tuminyiri kubha tusiigiri abhaana
bha Mungu, ku kusiiga Mungu na kugwata
amaswaja gaazi.

3 Ukusiiga Mungu nekwe ukugwata amaswaja
gaazi. Na kugwata amaswaja gaazi kutari
kukung'u,

* 4:21 Rora Abharaawi 19:18; Amahiitya gi Imigira 6:4-5; Maaroko
12:30-31.

4 ku kubha abhaana bhushi bha Mungu bharahiza ubhubhi bhwi isi. Ihu nimbu tukuhiza ga kusi kanzira yu ubhwisirirya bhwit.

5 Ni-wiwi wanu akutara kuhiza ubhubhi bhwi isi? Ni-wanu akwisirirya Yisu ni-Mwana wa Mungu.

Ubhuminyikiriri iguru wa Yisu Kiriisitu

6 Yisu Kiriisitu newe iiziri kwa amanzi na kumasaahi. Atiiziri kwa amanzi ageene, nawe kwa amanzi na kumasaahi.

7 Ne Ekoru Indindu iramenyeekererya kubha gayo ni-ga amaheene, ku kubha Ekoru Indindu neyo amaheene.

8 Kuna abhaminyikiriri bhatatu bhanu bhakomenyeekererya ing'ana ya Yisu [mwisaaru: ni-Bhaabha, Ring'ana ne Ekoru Indindu, na abhaatu bhanu, ne kegero kimwi.

9 Na kuna atatu ganu gareerekeererya kusi], Ekoru, amanzi na amasaahi, na atatu ganu gariisiriran'ya. Turiisirirya obhomenyeekererya bhwa abhaatu, no obhomenyeekererya bhwa Mungu nebhwe ubhukuru bhukung'u, ku kubha bhuyo nebhwe obhomenyeekererya bhanu Mungu ahurukiryi iguru wu Umwana waazi.

10 Wwushi wanu akwisirirya Umwana wa Mungu, isiriiryi kubha obhomenyeekererya bhuyo, ni-bhwa amaheene. Nawe wanu atakwisirirya Mungu, arabhuga Mungu ni-mubhihi, ku kubha atabhwisiriiryi obhomenyeekererya bhanu Mungu ahurukiryi iguru wu Umwana waazi.

11 Obhomenyeekererya bhuyo nebhwe bhanu: Mungu atuhiri ubhuhuru bhwa kemerano.

Ubhuhuru bhuyo tarabhobhona kanzira yu ukwisirirya Umwana waazi.

12 Wawusi wanu anu ubhumwimwi nu Umwana wa Mungu, anu ubhuhuru bhuyo. Nawe wanu ataana ubhumwimwi nu Umwana wa Mungu, ataana ubhuhuru.

Amang'ini gu ubhwikari bhwa kemerano

13 Nirabhaandikira amang'ana gayo, bhanu mukwisirirya iriina ryu Umwana wa Mungu, korereke momenye manu ubhuhuru bhwa kemerano.

14 Itwi tanu ubhukararu mubhutangi bhwa Mungu, ku kubha tuminyiri kubha aratwigwa turaamusabhi ryaryusi kuring'aana nu ubhusigi bhwazi.

15 Tuminyiri kubha aratwitegeerera hanu tukamusabha, neyo enzobhooro tono obhoheene kubha aratoha ganu tukamusabha.

16 Umuntu areerore umuhiiri waazi arakora ubhubhi bhunu bhutakumutwura kore na Mungu kemerano, amusabhiri, na Mungu aramoha ubhuhuru. Riyo ni-kubhanu bhakokora ubhubhi bhunu bhutakubhatwura kore kemerano. Nawe kunu ubhubhi bhunu bhukutwura umuntu kore na Mungu kemerano. Nitakubhuga amusabhiri iguru wu ubhubhi bhuyo.

17 Kokora ryaryusi rinu ritakwenderwa mubhutangi bhwa Mungu, ni-bhusarya. Nawe hamwimwi na gayo, bhoreho ubhubhi bhunu bhutakuhira umuntu muruku.

18 Tuminyiri abhaana bha Mungu bhatakong'eha kokora ubhubhi,* ku kubha

* 5:18 Rora 1 Yoozana 3:9.

Umwana wa Mungu arabhariibha, na Shitaani atakutara kubhakora ryuryusi.

¹⁹ Tuminyiri itwi, ni-bhaana bha Mungu, ni isi yusi ikakangatwa na Shitaani.

²⁰ Na tuminyiri kubha Umwana wa Mungu amariri kuuza, atuhiri amang'ini, korereke tomenye Mungu wa amaheene. Tunu ubhumwimwi na Mungu wa amaheene, kanzira ya kubha nu ubhumwimwi nu Umwana waazi Yisu Kiriisitu. Wenu newe Mungu wa amaheene nu ubuhuru bhwa kemerano.

²¹ Abhaana bhaani abhasigwa, mubhi misu matasengera amasambwa.[†]

[†] 5:21 **Mutasengera amasambwa**, ubhugaruri ubundi bharatara kubha, mwiyangariri na chuchi kina kikutara kogega umweya gwa Mungu mokoro yaazu.

**Ubhuragi Ubhuhya Mukigambũ chi Ikikiizũ
Ikizu: Ubhuragi Ubhuhya Mukigambũ chi Ikikiizũ (New
Testament+) for Tanzania**

copyright © 2024 Wycliffe Bible Translators, Inc.

Language: (Ikizu)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 3 May 2025 from source files dated 3 May 2025

cfe4772f-9f09-59a0-b72b-3863d6657553